

ՆՈՐ ՏԵՂԵԿՈՒԹՅՈՒՆՆԵՐ ՀՈՎՍԵՓ ԳԻՆԻՔԵԿՅԱՆԻ ՄԱՍԻՆ

Պատմ. գիտ. դոկտոր Վ. Ռ. ԳՐԻԳՈՐՅԱՆ

Հայոց կաթողիկոս Ղուկաս Կարնեցու անտիպ կոնդակների ու նամակների սևագրություններն ուսումնասիրելու ժամանակ մեր ուշագրությունը գրավեց կաթողիկոսի քարտուղարներից մեկի՝ Անանիա սարկավազի կողմից 1781 թ. նոյեմբերին կատարված մի նամակի համառոտագրությունը, որն ամբողջովին վերաբերում է Թիֆլիսահայ շիվանագետ և ճանապարհորդ Հովսեփ Դինիբեկյանին: Հետևելով իր նախորդի՝ Սիմեոն Երևանցի կաթողիկոսի օրինակին, Ղուկաս Կարնեցին կաթողիկոս ընտրվելու ժամանակներից մինչև իր մահը (1780—1799), հատուկ մատչանների մեջ կանոնավոր կերպով գրանցել է տվել իր առաքած նամակների ու կոնդակների բովանդակությունները և սևագրությունները: Այդ ամենը, պահպանված մյուս նյութերի հետ միասին, արժեքավոր աղբյուր են XVIII դարի Հայաստանի, ինչպես և շրջակա երկրների քաղաքական ու սոցիալ-տնտեսական կյանքի պատմությունն ուսումնասիրելու համար¹: Մոտավոր հաշվումներով Ղուկաս Կարնեցուց մեզ հասած նամակների ու նրանց համառոտագրությունների թիվը հասնում է 6000-ի, որոնցից սուրյժմ հրատարակված է միայն մի փոքրիկ մասը (220 նամակ և 150 համառոտագրություն): Մաշտոցի անվան Մատենադարանում աշխատանքներ են տարվում այդ նյութերի առաջին հասուրը հրատարակելու ուղղությամբ. դա փաստորեն շարունակությունը կհանդիսանա վաստակաշատ բանասեր Գյուտ Աղանյանի հրատարակած «Դիվան հայոց պատմության» մեծարժեք ժողովածուի: Ահա այդ աշխատանքի ընթացքում, ի թիվս ուշագրավ այլ նյութերի, երևան եկավ նաև Հովսեփ Դինիբեկյանին վերաբերող համառոտագրությունը:

Հարկ է նշել, որ Հովսեփ Դինիբեկյանի վերաբերյալ նյութերն այնքան էլ շատ չեն և ոչ ոք մինչև այժմ հատուկ ուսումնասիրության առարկա չի դարձրել այդ հետաքրքրական անձնավորության կյանքն ու գործունեությունը: Եղած նյութերից հայտնի է, որ նա ապրել ու գործել է Թբիլիսիում, ծառայել է վրաց թագավոր Հերակլ II-ի արքունիքում և պաշտոնական առաքելությամբ հաճախակի ուղևորություններ է կատարել դեպի Հնդկաստան: Հերակլ թագավորը և հայոց կաթողիկոսները նրա միջոցով նամակագրական

¹ Ղուկաս Կարնեցու գրագրությունների արժեքը փորձել ենք ներկայացնել ՍՍՀՄ գիտությունների ակադեմիայի պատմության բաժանմունքին կից տեքստաբանական հանձնաժողովի և Վրացական ՍՍՀ գիտությունների ակադեմիայի Կ. Ս. Կեկելիձեի անվան ձեռագրերի ինստիտուտի: Նախաձեռնությամբ 1969 թ. նոյեմբերին Թբիլիսիում գումարված տեքստաբանությանը և ին ձեռագրերի ուսումնասիրման հարցերին նվիրված նստաշրջանում տրված զեկուցմամբ, որը հրապարակվել է վրացական ակադեմիայի «Մացնե» գիտական պարբերականում (տե՛ս В. Р. Григорян, Архив армянского католика Гукаса Карнеци как первоисточник по истории Закавказья последних десятилетий XVIII века, «ՁԵԿՆԵ», յերևա ԺԺ ԼՊԵՐՅԱԾԵՐՈՅ ՆԵՐՈՅ, 4, 1972, էջ 172—176):

կապ են պահպանել հայ ազատագրական շարժման նշանավոր գործիչներից մեկի՝ Մաղրասում ապրող Շահամիր Շահամիրյանի հետ: Այդ հեռավոր և վերին աստիճանի վտանգավոր ուղևորությունները, որոնք կապված էին մեծամեծ դժվարությունների հետ, դարձել էին Դինիբեկյանների մասնագիտությունը: Ինչպես կտեսնենք, Հովսեփի նախնիները ևս ունեցել են թագավորներից ստացած արտոնություններ այդորինակ ուղևորություններ կատարելու համար: Անտարակույս, առևտուրը նրանք համատեղում էին դիվանագիտական հանձնարարություններ կատարելու հետ: Հովսեփի մահից հետո վրաց թագավորի հանձնարարությամբ մի քանի անգամ դեպի Հնդկաստան է ուղևորվել Հովսեփի որդին՝ Ռաֆայել Դանիբեկովը (Դանիբեկյանը)², որը նույնպես նամակագրական կապ էր ապահովում հնդկահայ գործիչների ու վրաց լարբունիքի միջև: 1815 թ. Մոսկվայում լույս ընծայվեցին Ռ. Դանիբեկովի ուղեգրությունները, որոնք վերջերս ունեցան մի շարք հրատարակություններ:

Ռաֆայել Դանիբեկովի ուղեգրությունները ռուսերենի հետ միասին հրատարակվել են նաև անգլերեն և հինդի լեզվով: Այդ հրատարակությունն իրականացրել է աշխարհագրական գիտությունների դոկտոր Լ. Ր. Մարուաշվիլին, որը Ռ. Դանիբեկովի ուղեգրությունների ուսումնասիրմամբ զբաղվում է 1946 թ.: Չնայած այն բանին, որ նրա ձեռքի տակ եղած փաստաթղթերում տեղեկություններ կան Ռաֆայելի հոր՝ Հովսեփի մասին, բայց նա այդ նյութերը չի լրացրել հայկական սկզբնաղբյուրներում պահպանված վկայություններով, որոնց վրա ուղագրություն է հրավիրել պրոֆ. Ս. Տեր-Ավետիսյանը դեռևս 1940 թ.³:

Նախքան Ղուկաս Կարնեցու գրություններում Հովսեփ Դինիբեկյանի մասին պահպանված նյութերին անցնելը, ի մի բերենք այն ամենը, ինչ հայտնի է նրա մասին:

Հովսեփ Դինիբեկյանի որդուն՝ Ռաֆայելին Քարթլ-Կախեթի թագավոր Գեորգի XII-ի 1799 թ. սեպտեմբերի 14-ին տրված հրովարտակից իմանում ենք, որ Դինիբեկյանների ընտանիքը շահերից ու թագավորներից ստացել է շնորհագրեր, և որ Գեորգիի պապը՝ Թեյմուրազ թագավորը, Ռաֆայելի ուսուցիչն, այսինքն Հովսեփի հորը շնորհել է դադբաշու (տասնապետի) կոչում, իսկ Հեռակ թագավորը Հովսեփին տվել է խուլասիս-թավիի (հինգհարյուրապետի) կոչում՝ համապատասխան ռոճիկով⁴: Իր հերթին այդ կոչումը Գեորգի XII թագավորը շնորհում է Ռաֆայելին, նրա ժառանգներին ու եղբորը՝ Հովսեփին: Նույն հրովարտակից երևում է, որ Դինիբեկյանները ունեոր ընտանիք են եղել, ունեցել են տներ, այգիներ, արոտավայրեր, ինչպես և ձեռք են բերել ճորտեր: Նույն փաստաթղթի «հավելվածում» հիշատակվում է Հով-

² Հրապարակվող փաստաթղթերում Ռաֆայելի հոր՝ Հովսեփի ազգանունը գրված է Դինիբեկյան: Կարելի է ենթադրել, որ դա ազգանվան սկզբնական ձևն է և որ այն հետագայում է դարձել Դանիբեկյան (Դանիբեկով):

³ «Путешествие Рафаила Данибегашвили в Индию, Бирму и другие страны Азии (1795—1827)», М., 1969.

⁴ ՈՎ. Տեր-Ավետիսյան, Նյութեր Հնդկաստանի հայ գաղութի պատմության համար (Շամիր աղա Շահամիրյանի, Ղուկաս կաթողիկոսի և վրաց Հեռակ թագավորի գրությունները), «Երևանի պետական համալսարանի գիտական աշխատություններ», հատ. 13, Երևան, 1940:

⁵ «Путешествие Рафаила Данибегашвили...», էջ 66:

սեփի կնոջ՝ Ռուկայի անունը⁶։ Ավելի ուշ՝ 1807 թ. նոյեմբերի 6-ին Հովսեփ Դինիբեկյանի որդու (Հովսեփի) թոշակ ստանալու համար գրված մի դիմումում հիշատակվում է Հերակլ II-ից Հովսեփ Դինիբեկյանի ստացած ռոճիկի շափը (մթերքներով ու դրամով՝ տարեկան 40 թուման)⁷։

Դինիբեկյանները վրացահայ կաթոլիկներից էին, բայց մշտապես կապված էին էջմիածնի ու նրա կաթողիկոսների հետ։ Թե՛ Հովսեփը և թե՛ նրա որդիները հաճախ էին լինում էջմիածնում, կատարում կաթողիկոսների հանձնարարությունները։ Անհրաժեշտության դեպքում կաթողիկոսները հանձնարարական նամակներ էին տալիս նրանց⁸։

Հովսեփ Դինիբեկյանի դեպի Հնդկաստան կատարած ուղևորությունների մասին Ղուկաս կաթողիկոսի և Շահամիր Շահամիրյանի նամակներում եղած տեղեկությունները գրավել են ցիտնականների ուշադրությունը, որոնք և հակիրճ ծանոթագրություններ են թողել Հովսեփի մասին։ «Հովսեփ հարյուրապետը, — գրել է Ս. Վ. Տեր-Ավետիսյանը, — Հերակլ թագավորի կողմից ուղարկված էր Հնդկաստան Շահամիրյանի մոտ տանելով հետը լուռին Շահամիրյանին նվիրելու հրովարտակը...»⁹։ «Հրովարտակը Հնդկաստան տանելու համար Հերակլ Բ-ն ուղարկում է հարյուրապետ Հովսեփին, որի անունը հաճախ կրկնվում է Ղուկաս կաթողիկոսի և Արղության գրություններում»¹⁰։ Հենվելով Ղուկաս Կարնեցու անտիպ նամակների վրա, պատմաբան Ա. Ռ. Հովհաննիսյանը ցույց է տվել, որ վրաց թագավորի հատուկ պատվիրակ, թիֆլիսեցի հարյուրապետ Հովսեփը Հնդկաստան էր տարել Հերակլ II-ի 1786 թ. մարտի 22-ի հրովարտակը, որով իշխանական կոչում էր շնորհվում Շ. Շահամիրյանին և վերադարձին իր հետ բերել էր վերջինիս պատասխան նամակը և թագավորի համար տրված նվերները¹¹։ «Հինգհարյուրապետ Հովսեփ Դանիբեգյան, — ծանոթագրում է պատմաբան Ռ. Ա. Աբրահամյանը, — վրացական արքունիքի քաղաքական, դիվանագիտական աչքի ընկնող դեմքերից։ Շահամիրյանի հետ կապեր հաստատելու համար Հերակլի կողմից առաքվել է Հնդկաստան։ Դանիբեգյանն էր, որ Հնդկաստան տարավ ոչ միայն Շահամիրյանին վրաց իշխանի տիտղոս շնորհելու արքայական հրովարտակը, այլ նաև Արղությանի, կաթողիկոսի և բազմաթիվ այլ անձանց նամակները»¹²։

Բանասեր Պ. Մուրադյանը վերջերս հրապարակելով նորահայտ նյութեր Ռաֆայել Դանիբեկովի ու նրա ուղեգրության վերաբերյալ, ուշադրություն է դարձրել նաև Ռաֆայելի հոր՝ Հովսեփի վրա և նշել այն բոլոր աշխատությունները, որոնցում հիշատակված է Հ. Դինիբեկյանը¹³։

⁶ Նույն տեղում, էջ 67։

⁷ Նույն տեղում, էջ 69։

⁸ П. М. Мурадян, Новые материалы о Рафанле Данибегове. «Բանբեր Երևանի համալսարանի», 1973, № 3, էջ 176։

⁹ Ս. Վ. Տեր-Ավետիսյան, նշվ. աշխ., էջ 83։

¹⁰ Նույն տեղում, էջ 39։

¹¹ А. Р. Ноаннисян, Россия и армянское освободительное движение в 80-х годах XVIII столетия, Ереван, 1947, էջ 153։

¹² Ռ. Ա. Աբրահամյան, Շահամիր Շահամիրյանի նորահայտ նամակագրությունը, «Բանբեր Հայաստանի արխիվներ», 1969, № 3, էջ 153։

¹³ П. М. Мурадян, նշվ. աշխ., էջ 184։

Հովսեփ Դինիբեկյանը Հնդկաստան է ուղևորվել մի քանի անգամ: 1785 թ. հոկտեմբերի 15-ին Հերակլ II-ին ուղղած իր նամակում Շահամիր Շահամիրյանը գրում է, որ այդ ժամանակ Հովսեփը ժամանել է Հնդկաստան: Պարզվում է, որ Հովսեփն իր հետ տարած է եղել Հերակլի նամակը՝ ուղղված թուրքաց սուլթանին: Այդ նամակը Հ. Դինիբեկյանը հանձնել է Բաղդադի փաշային: Ինչ-ինչ նկատառումներով վերջինս Հովսեփին երեք ամիս պահում է (գուցե և կալանավորում) Բաղդադում, որից հետո թույլ է տալիս շարունակել ճանապարհը դեպի Հնդկաստան: «Բաղդատու փաշայն,— կարդում ենք այդ նամակում,— ստացաւ Յովսէփոս հինգհարիւրապետէս օրինակ նամակի շնորհաց քոց, որ առ իս և առաքեաց Կոստանդնուպօլիս ի սպաս սուլթանի, և արգելեաց հինգհարիւրապետին Բաղդատ երիս ամիս ժամանակաւ, և ապա արձակեաց սա մեզ»¹⁴:

Նույն նամակից տեղեկանում ենք, որ Հովսեփը Հնդկաստանից մեկնել է 1785 թ. դեկտեմբերի կեսերին «զոր ինչ այլ իմն հարկաւորութիւն այսոհետև զրեցելոց եմ ձեռամբն պատուելի Յովսէփի հինգ հարիւրապետաւ, որպէս հաւատացեալ եմ, զի նա ելանելոյ ի մէնջ միջոց երկու ամիս ժամանակաւ»¹⁵:

Դատելով եղած նյութերից, կարելի է ասել, որ սա Հովսեփ Դինիբեկյանի հերթական ուղևորութիւններից մեկն էր դեպի Հնդկաստան, մինչ այս ճանապարհորդութիւնը նա արդեն եղել էր Հնդկաստանում, իսկ հետագայում նա դարձյալ այցելում է այդ հեռավոր երկիրը: Շ. Շահամիրյանի 1787 թ. հոկտեմբերի 15-ին Մադրասից Ղուկաս կաթողիկոսին ուղարկած նամակից տեղեկանում ենք, որ տեղ հասնելուց հետո Հովսեփը կրկին ճանապարհ է ընկնում դեպի Հնդկաստան՝ բերելով իր հետ մի շարք նամակներ: Այսպես, նրա միջոցով Շ. Շահամիրյանը ստացել է Ղուկաս կաթողիկոսի 1785 թ. մայիսի 22-ին և 1786 թ. փետրվարի 5-ին գրած նամակները: Հ. Դինիբեկյանը Հնդկաստան էր տարել նաև ռուսահայոց հոգևոր առաջնորդ Հովսեփ Սրղությանի և այլ անձանց նամակները¹⁶: Շահամիր Շահամիրյանը Հովսեփ Դինիբեկյանից բանավոր կերպով լուրեր է ստանում Անդրկովկասի վիճակի մասին՝ «ի բերանէ պարոն Յովսէփոս հինգհարիւրապետէ լուաք»¹⁷: Այս ժամանակ է նա բերել Հերակլ II-ի 1786 թ. հրովարտակը¹⁸:

1789 թ. Ղուկաս կաթողիկոսը Շ. Շահամիրյանին գրել է. «Իսկ ի միւս թուղթդ զրեալ էիր զվերադառնալն այտի հարիւրապետ Յովսէփին թիֆլիզեցւոյ»¹⁹: Դժվար է ասել, թե որ ժամանակներին է վերաբերում Հովսեփի վերադառնալու մասին այս հիշատակութիւնը, բայց մի այլ նամակ ավելի սլարդութիւն է մոցնում հարցի մեջ. երևում է, որ 1792 թ. մայիսին Հովսեփը գտնվել է Մադրասում. «Վասն որոյ այժմում,— գրում է Շ. Շահամիրյանը Ղուկաս կաթողիկոսին 1792 թ. մայիսի 14-ին,— որ ընթերցայ ի նամակի Քում, զլուրն Յովսէփ հարիւրապետին, և զյանձնարարութիւնն Քոյին Պատուականութեան զկարապետ վրաց վաճառականին եղև ի սրտի իմում

14 Ռ. Ա. Արքայական, նշվ. աշխ., էջ 136:

15 Նույն տեղում, էջ 137:

16 Նույն տեղում, էջ 128—129:

17 Նույն տեղում, էջ 129:

18 Ս. Վ. Տեր-Ավետիսյան, նշվ. աշխ., էջ 39:

19 Նույն տեղում, էջ 64:

փորրիկ Իրան խղճատանաց... Նույն Յովսէփ հարիւրապետն ի ժամանակի գալստեան նորա առ մեղ հանդիպեալ է Քոյին սրբութեան, որպէս այս Կարապետ վաճառականս...»²⁰։ Հայտնի չէ, թե Հովսեփ Դինիբեկյանը ե՞րբ է հայրենիք վերադարձել իր այս նոր ուղևորությունից։ Կարծում ենք դեպի Հնդկաստան Հ. Դինիբեկյանի կատարած ուղևորությունների հարցը դեռևս կարոտ է ուսումնասիրման։

Վրաց թագավորի հանձնարարությամբ ուղևորություններ կատարելով Հնդկաստան, Հովսեփ Դինիբեկյանը նամակադրական կապ է ապահովել մի կողմից Շ. Շահամիրյանի, մյուս կողմից՝ Ղուկաս Կարնեցի կաթողիկոսի, Հովսեփ Արղուիթյանի և այլոց հետ։ Հայտնի իրողություն է, որ հնդկահայ գաղութն այն ժամանակ հայ ազատագրական շարժման կարևոր կենտրոններից էր և Հ. Դինիբեկյանի դերը որպես «կապավորի» դժվար է գերազնահատել։ Զի կարելի կարծել, որ Հ. Դինիբեկյանը հանդես է եկել սոսկ նամակներ ու նվերներ տեղափոխողի համեստ դերով։ Նա, անտարակույս, քաջատեղյակ է եղել հայրենի երկիրն օտար տիրապետությունից ազատագրելու ուղղությամբ հնդկահայ հայրենասերների ծավալած գործունեությանը և իր հնարավորության սահմաններում ձգտել է օգտակար լինել նրանց։ Մի շարք անձանց նամակները Շ. Շահամիրյանին հանձնելուց բացի, նա բանավոր տեղեկություններ է հաղորդել նրան Հայաստանի ու շրջակա երկրների քաղաքական վիճակի մասին, մի բան, որ չափազանց կարևոր է եղել հեռավոր Մադրասում ապրող Շ. Շահամիրյանի ու նրա համախոհների համար։ Պետք է կարծել, որ Շ. Շահամիրյանը իր տպաբանում հրաշարակված գրքերը նաև Հ. Դինիբեկյանի միջոցով է ուղարկել Ղուկաս կաթողիկոսին, Հերակլ թագավորին, Ղարաբաղի մելիքներին և այլ անձանց։ Ինչպես կտեսնենք, Հ. Դինիբեկյանի միջոցով է էջմիածին ուղարկվել Շ. Շահամիրյանի պատվերով հրատարակված Հայաստանի քարտեզը։

Հետաքրքրական է, որ կադարյանները ևս, որոնք այդ ժամանակ ազատագրական շարժման ոուսահայ շրջանակի ամենաեռանդուն ներկայացուցիչներից էին, ծանոթ են եղել Հ. Դինիբեկյանի հետ²¹ և հավանորեն նրա միջոցով նամակադրության մեջ են եղել Մադրասի գործիչների հետ։

Առայժմ հայտնի չէ Հ. Դինիբեկյանի մահանալու թվականը։ Հաստատորեն կարելի է ասել, որ դա տեղի է ունեցել մինչև 1799 թ. սեպտեմբեր ամիսը, որովհետև սեպտեմբերի 14-ին Ռաֆայել Դանիբեկովին տված հրովարտակի մեջ վրաց Գեորգի XII թագավորը գրել է. «և քո հայրը՝ Հովսեփը մահացել է մեր հոր և իմ մոտ ծառայության մեջ լինելով»²²։ Եթե Հ. Դինիբեկյանը ծառայել է նաև Գեորգի XII-ի մոտ, ուրեմն նա վախճանվել է նրա գահակալումից հետո (1798 թ.) և նախքան այս հրովարտակի գրվելը (1799 թ. 14 սեպտեմբերի)։

Ղուկաս Կարնեցու քարտուղարի 1781 թ. նոյեմբերի 9-ին կատարած գրառումից երևում է, որ Հովսեփ Դինիբեկյանը Հնդկաստան է ուղևորվել երեք տարի առաջ՝ այսինքն 1778 թ. և վերադարձել 1781 թ. աշնանը։ Նա եկել էր Բաքվի վրայով, որովհետև տեղեկություն կա այն մասին, որ Բաքվի խանը մի առ ժամանակ ձերբակալել էր նրան։ Հնդկաստանից կաթողիկոսի

²⁰ Նույն տեղում, էջ 83։

²¹ Է. Գևորգյան, Հարություն Ալամդարյան, Նրևան, 1977, էջ 49։

²² «Путешествие Рафаила Данибегашвили...», էջ 66։

համար նա բերել էր նամակներ և նվերներ: Բայց մինչև էջմիածին գալը, նա պետք է սկզբում լիներ Հերակլ II թագավորի մոտ: Ահա այդ ամենի մասին Հովսեփ Դինիբեկյանը նամակով հայտնում է կաթողիկոսին: Պատասխան նամակում Ղուկաս Կարնեցին գրում է, որ իր գործերն ավարտելուց հետո Հովսեփը գա էջմիածին, իսկ եթե նրա գալը հետաձգվի, ապա թող իր բերած իրերը կնքված վիճակում հանձնի վերահայտց հոգևոր առաջնորդ Կարապետ վարդապետին և էջմիածնի վեթիլ (գործակալ) տեր Ղազարին, որոնք և դրանք է՛հասցնեն իրեն:

Այդ կապակցությամբ Ղուկաս կաթողիկոսը նամակ է գրել նաև Կարապետ վարդապետին և համապատասխան կարգադրություն արել Հնդկաստանից Հ. Դինիբեկյանի բերած իրերը էջմիածին հասցնելու վերաբերյալ:

1785 թ. մայիսի 25-ին Շ. Շահամիրյանին Ղուկաս կաթողիկոսի ուղղած նամակի սևագրությունից երևում է, որ Հ. Դինիբեկյանը Շ. Շահամիրյանից բերել էր երկու նամակ, որոնցից առաջինը (գրված 1779 թ.) հասցեագրված էր Սիմեոն Երևանցի կաթողիկոսին: Այդ նամակը, ինչպես և երկու քարտեզ, տրված էին եղել ոմն Ասլանի, իսկ վերջինս էլ հանձնել էր Հ. Դինիբեկյանին: Երկրորդ նամակը (1780 թ.), որ նույնպես հասցեագրված էր Սիմեոն կաթողիկոսին, նվերներով հանդերձ, Շ. Շահամիրյանը հանձնել էր Հ. Դինիբեկյանին: Խոսք կա նաև երրորդ նամակի մասին (1782 թ.), որը, սակայն, էջմիածին է հասցրել Հնդկաստանից նոր վերադարձած նվիրակ Գրիգոր վարդապետը: Կաթողիկոսը Շ. Շահամիրյանին շնորհակալությամբ հայտնում է Հովսեփ հարյուրապետի միջոցով ուղարկված նվերների ստացման մասին, թվարկում է դրանք (վեց հակ տարբեր գույնի կտավներ և մահրամա՝ սրբիչի նմանվող կտոր): Հիշատակվում է նաև «զարմանալի աշխարհացոյցն», որն անմիջապես կախվում է պատից «հանդեպ աշաց, միշտ վայելեմք յիշատակելով զսիրելի բարեօք յիշեցմամբ»:

Ստորև բերում ենք Հ. Դինիբեկյանին Ղուկաս կաթողիկոսի հասցեագրած նամակի համառոտագրությունը, Կարապետ վարդապետին ուղարկված նամակի համառոտագրության այն մասը, Պրտեզ խոսվում է Հ. Դինիբեկյանի մասին, ինչպես և մի հատված Ղուկաս կաթողիկոսի՝ Շ. Շահամիրյանին ուղղած նամակից:

Ա.

«[1781 թ. 9 նոյեմբերի] ԹՈՒՂԹ ԵՎՍ ԱՌ ԴԻՆԻԲԵԿԵԱՆՅ ԽԱՏԻՆԻ
ՈՐԴԻ ՊԱՐՈՆ ՅՈՎՍԷՓՆ ԳՐԵԱՅ Ի ՊԱՏԱՍԽԱՆՆԻ ՆՈՐԻՆ Ի ՀՈԿՏԵՄԲԵՐԻ Թ(9)
ԵՎ Ի ԳԵԱՆՋԱՅՈՒ ԳՐԵԱՂ ԹՎԹՈՅՆ:

Եւ արդ, զսմանէ այսպէս է գիտելի, զի սա յառաջ քան զԳ(Յ) ամս դնադեալ էր ի Հնդիկս և այժմ վերադարձեալ անտի հանդերձ թղթովք ի նուիրակէն մերմէ առ սրբազանն և յրնծայիւք յոմանց առ Հերակլ արքայն, նաև առ սրբազանն ևս, և կեալ էր հասեալ ի Բաբու, յորոյ իշխողէն ըմբռնեցեալ էր և արձակեցեալ ապա: Իսկ այժմ գրեալ էր սրբազան վեհին, թէ զթուղթս ունիմ ի նուիրակէն և զրնծայ ևս ունիմ անտի և այլն: Բայց ոչ կարեմ գալ յայդր, մինչ ոչ նախ գնացեալ տեսից զարքայն: Ապա յետ տեսանելոյս զնա, գալոց եմ և զորս ընդ իս, ինքնին բերելոց եմ:

Առ որ գրեալք սրբազանն, թէ եթէ մինչև ցարդ զհոգալի բանսդ տեսե՞ր յայդր, շուտով զբերեալսդ առեալ հասուցես մեզ: Իսկ եթէ քո յայդր մնալն

յամիցի, զայդոսիկ քոյինդ կնքով կնքեալ յանձնեսցես առաջնորդին տեղ-
ւոյդ՝ Կարապետ վարդապետին և գործակալին մերոյ՝ տէր Ղազարին, որք ամ-
բողջ հասուցին առ մեզ:

Դադափարն թղթոյս այսորիկ ի վերայ կտոր թղթոյ իրիք է»²³:

Բ.

«[1781 թ. 9 նոյեմբերի] ԹՈՒՂԹ ԵՎՍ ՅԱՏԿԱՊԷՍ ԱՌ ԱՌԱՋՆՈՐԴ
ԿԱՐԱՊԵՏ ՎԱՐԴԱՊԵՏՆ ԳՐԵԱՅ, ՅՈՐՈՒՄ ՆԱԽ ՅԻՇԵԱՅ, Թէ ԹՈՒՂԹԴ
էՀԱՍ ԸՆԴ ՍԻՄէՕՆ ՎԱՐԴԱՊԵՏԻՆ, ՈՐՈՒՄ ԵՐԿԱՐ ՊԱՏԱՍԽԱՆԻ ԳՐԵՅԱՔ
Ի ՎԵՐԱՅ ՔՈՒ ԵՎ ՏԷՐ ՂԱԶԱՐԻՆ ԱՀԱ, ԶՈՐՍ ՏԵՍԱՆԵԼՈՅ ԷՔ:

...Եւ ապա զոր ինչ գրեաց առ Դինիբեկեանց Խատինի որդի Յովսէփին,
յասս ի Հնդու բերեալ թղթոցն (որ ահա ի վերդ ի թուղթն նորա յայտնի է) սմա
ևս ծանոյց. թէ զայս ինչ գրեցաք նմա և զթուղթն յղեցաք առ ձեզ, դու և տէր
Ղազարն տաչիք նմա, իթէ գալոյ լինի, գայցէ, ապա թէ ոչ, զգրեանսն և զա-
ւանդն մեր, որ առ նա, առեալ շուտով ընդ հաւատարմի յղեսցիք:

Գրեցան և յղեցան թուղթքս ընդ Սիմէօն վարդապետին, յամսոյս Թ(9)»²⁴:

Գ.

«[1785 թ. 22 մայիսի]—ԹՈՒՂԹ ԱՌԱՋԻՆ Ի ՀՆԴԻԿՍ Ի ՄԱՏՐԱՍՆ ԱՌ ՇԱ-
ՀԱՄԻՐ ԱՂԱՅՆ Ի ՊԱՏԱՍԽԱՆԻ ԹՂԹՈՅ ՆՈՐԻՆ ԸՆԴ ԺԱՄԱՆԱԿՍ ԺԱՄԱՆԱԿՍ
ԴՐԵՅԵԼՈՅ ԱՌ ՀԱՆԳՈՒՅԵԱԼ ՀԱՅՐԱՊԵՏՆ ԵՎ ԱՌ ՆՈՐՈԳ ՍՐԲԱԶԱՆ ՎԵՀԱՊԵՏՍ
ՄԵՐ: ՕՐՀՆՈՒԹԻՒՆ ԵՎ ՇՆՈՐՀԱԿԱԼՈՒԹԻՒՆ ՍԱԿՍ ՅԱՌԱՋ ԵՎ ԱՅԺՄ ԸՆԴ ՆՈՐ-
ԻՐԱԿ ԳՐԻԳՈՐ ՎԱՐԴԱՊԵՏԻՆ ՅՂԵԱԼ ԸՆԾԱՅԻՅՆ (ՅԻՇԵԼՈՒ ԵՎ ԶՄԻՆԶԵՎ ՅԱՅ-
ԺԸՄ ԹՈՒՂԹ ԶԳՐԵԼՈՅ ՊԱՏՃԱՌՆ) ԵՎ ՅՈՐԴՈՐՈՒՄՆ Ի ՍԷՐ ԵՎ Ի ՀԱՐԱԶԱՏՈՒ-
ԹԻՒՆ ՍՐԲՈՅ ԱԹՈՒՈՅՍ ԵՎ ԻԻՐ: ԵՒ ՎԱՍՆ ՆՈՐ ՆՈՒԻՐԱԿԻՆ ԵՎՍ ՅԱՆՁՆԱՐԱ-
ՐՈՒԹԻՒՆ:

... Զի Գ(3) թուղթք ազնուոյդ, որոց երկուքն առ հոգելոյս հայրապետն
է: մին ի վերայ մեր գրեցեալ, հասին առ մեզ: Առաջինն էր ի 1779 թուոյն
Պրկչին գրեցեալ և հանդերձ Բ(2) նորատիպ աշխարհացուցիւ յանձնեալ
ուժմն Ասլանի և ի նմանէ ևս յանձնեցեալ հարիւրապետ Յովսէփին, որոյ
ձեռամբ մեզ հասեալ եղև: Երկրորդն էր ի 1780 թուոյն գրեցեալ և Ա(1) կա-
պոց ամանաթով հանդերձ տուեալ նոյն յիշեալ Յովսէփին, զոր ընդ առաջին
թղթոյդ և աշխարհացուցացդ ի միասին իսկ հասոյց առ մեզ: Եւ ի մէջ կապո-
ցին, որ ըստ կնքեալ սիահնոյդ գոյին Բ(2) սպիտակ կտաւ, Բ(2) գունաւոր
կտաւ, և Բ(2) թօփ մահրամայք, սիրով բազմաւ և առաւել շնորհակալու-
թեամբ ընկալաք ի վայելս և օրհնեմք զառատասէր սիրելիդ բերանալիր օրհ-
նութեամբ և զզարմանալի աշխարհացոյցն ևս կախեալ զորմոյ հանդէպ
աչաց, միշտ վայելեմք յիշատակելով զսիրելիդ բարեօք յիշեցմամբք:

Իսկ երրորդ թուղթդ, գրեցեալ ի 1782 թուոյն ընդ նուիրակ Գրիգոր հա-
մեստափայլ վարդապետին, էհաս ի ձեռս մեր, զոր առ մեզ իսկ էիր գրեալ:
Զոր և մեք առ ընկալեալ սիրով ընթերցաք և իմացաք զամենայն գրեալսդ»²⁵:

Ինչպես տեսնում ենք, Ա և Բ նամակներն ուղարկվել են գյանջեցի Սի-
մեոն վարդապետի միջոցով, որը բերել էր Կարապետ վարդապետի նամակը:

23 Մաշտոցի անվ. Մատենադարան, ձեռ. N 4481, էջ 126բ:

24 Նույն տեղում, էջ 126բ—127ա:

25 Նույն տեղում, ձեռ. N 2803, էջ 737, 739—740:

Կարելի է կարծել, որ նրա ձեռքով է տեղ հասցվել նաև Ղուկաս կաթողիկոսին հասցեագրված Հ. Դինիբեկյանի նամակը:

Երկրորդ նամակի համառոտագրության վերջում նշված է նամակների շարադրման և առաքման ժամանակը՝ «յամսոյս Թ», որը դժվար չէ ճշտել մյուս նամակների օգնությամբ. դա տեղի է ունեցել 1781 թ. նոյեմբերի 9-ին:

Դժբախտաբար, չհաջողվեց գտնել Հ. Դինիբեկյանի նամակը: Ժամանակի փորձություններին, հավանաբար, չի դիմացել նաև Ղուկաս կաթողիկոսի նամակը՝ հասցեագրված Հովսեփ Դինիբեկյանին: Ինչպես երևում է վերը բերված համառոտագրությունից, Ա. նամակի սևագրությունը գրվել է ոչ թե այդ նպատակի համար պահվող հատուկ մատյանում, այլ «ի վերայ կտոր թղթոյ», որի պատճառով և այն բացակայում է Ղուկաս Կարնեցու դիվանում: Բայց և այնպես, այս վավերագրերը բավարար չափով պատկերացում են տալիս թե՛ Հովսեփ Դինիբեկյանի նամակի և թե՛ Ղուկաս Կարնեցի կաթողիկոսի գրած պատասխանի մասին:

Այժմ մի քանի խոսք Հ. Դինիբեկյանի միջոցով Շահամիր Շահամիրյանի ուղարկած նվերների մասին: Սիմեոն Երևանցի կաթողիկոսի կարգադրությամբ էջմիածնի վանքի ստացած նվերները գրանցելու համար ստեղծվել էր հատուկ մատյան, որը պահպանվել է և այժմ գտնվում է Մաշտոցի անվան Մատենադարանի արխիվային բաժնի կաթողիկոսական դիվանում²⁶: Այդ ձեռագիր մատյանում Սիմեոնի օրոք կատարված գրանցումներն այնքան էլ շատ չեն, որովհետև այն ստեղծվել էր նրա մահից ընդամենը մեկ տարի առաջ: Ղուկաս կաթողիկոսի գահակալության ողջ ընթացքում մուտքի այդ տեսրակում գրանցումները կանոնավոր կերպով կատարված են և հաշվետեղ տեղեկություն կա նաև Հովսեփ Դինիբեկյանի բերած իրերի վերաբերյալ: Մասյանի այն բաժնում, ուր գրառված են «Ընծայք քահանայից, իշխանաց, վաճառականաց, ուխտաւորաց և այլոց», գտնվում է Շահամիր Շահամիրյանի ուղարկած նվերների ցուցակը: Պարզվում է, որ Հնդկաստանից «թիֆլիսեցի ֆռանգ Յոսեփի» բերած իրերը էջմիածին են հասել 1782 թ. հունվարի վերջին՝ «ի յունվարի ելն», Այսինքն, վերը բերված նամակներից շուրջ երեք ամիս անց: Ինչպես տեսանք, Շ. Շահամիրյանը Ղուկաս կաթողիկոսին ուղարկել էր տարբեր տեսակի կտորներ՝ դատաք, սպիտակ կտավ, կապույտ մահրամա, ընդամենը վեց հակ:

Ստորև բերում ենք նաև մուտքի մատյանում կատարված այդ գրանցումը: «Ի ԽՄԼԱ (1782) ... Ի Հինդ բնակեալ Շամիր աղայն, ձեռամբ թիֆլիզեցի ֆռանգ Յոսեփին յղեալ էր. Բ (2) թօփ հնտու կապույտ դատաք, Բ (2) թօփ սպիտակ կտաւ, Բ (2) թօփ կապույտ մահրամայք, որոց Ա (1) թօփն ընդ տեկիրմի է: Ի յունվարի ելն»²⁷:

էջմիածնի վանքի ելից մատյանում կատարված գրանցումներից մեկից պարզվում է, որ այդ նվերները էջմիածին էր հասցրել ինքը՝ Հ. Դինիբեկյանը: Ի նշան շնորհակալության 1782 թ. փետրվարի 12-ին Հ. Դինիբեկյանին ընծայվել է մի ընտիր վերարկու, որը դրանից երեք տարի առաջ՝ 1779 թ. նոյեմբերի կապակցությամբ նվեր էր բերել Սրեանի խանը: Ստորև ամբողջությամբ բերում ենք այդ գրանցումը.

²⁶ Նույն տեղում, արխիվային բաժին, կաթողիկոսական դիվան, թղթ. 5, վավ. 36:

²⁷ Նույն տեղում, էջ 43:

«Թիֆլիզեցի ֆուսիսի Յոսեփին ի գալն ի սուրբ Աթոռս և բերելն զընծայն Շահամիր աղային, որոյ ետուք Ա(1) զէրպապ կապայ, որ էր մեր խանի տունեալն ի ՌՄԻԸ (1779) թուոջն նաւոսին: Մեք ի փետրվարի ԺԲ(12) ետուք նմայ»²⁸:

Նվերների մատյանում քարտեզների ստացման վերաբերյալ գրանցում չի կատարված, որովհետև այդ կարգի նվերները մուտքագրելու սովորություն չկար: Ինչ քարտեզ էր գա, որ այդպես սիրով ընդունվել էր կաթողիկոսի կողմից: Հայտնի է, որ Շ. Շահամիրյանի պատվերով, ի հիշատակ նրա վաղամեռ որդու՝ Հակոբ Շահամիրյանի, 1778 թ. վենետիկում, Մխիթարյան միաբանության տպարանում լույս էր ընծայվել Հայաստանի քարտեզը՝ «Աշխարհացոյց Հայաստանեայցը», որը ժամանակագրական կարգով վեցերորդ հայկական քարտեզն էր աշխարհում: Ուսումնասիրությունը ցույց է տվել, որ այդ «Աշխարհացոյցի» հրատարակությունը սերտ կապ ուներ Մադրասի հայրենասիրական խմբակի ընդհանուր նպատակների հետ և կարծես հանդիսանում էր «Նոր տետրակ ոչ կոչի հորդորակ» և «Իրողայթ փառաց» գրքերի հավելվածը: Այն կոչված էր նաև գործնական օգնություն ցույց տալու հայրենի երկրի ազատագրությանը նախանձախնդիր անձանց:

Ղուկաս Կարնեցու նամակներում, ինչպես նկատել է Ա. Ռ. Հովհաննիսյանը²⁹, տեղեկություններ կան այն մասին, որ Շ. Շահամիրյանն այդ քարտեզներից մի քանի օրինակ, իր այլ հրատարակությունների հետ միասին, նոր Զուղայի վրայով ուղարկել էր Անդրկովկաս՝ հանձնելու հայոց կաթողիկոսին, Ղարաբաղի մելիքներին և Հերակլ II թագավորին, այսինքն այն անձանց, որոնց հետ մադրասցիները հույսեր էին կապել Հայաստանի ազատագրման իրենց ծրագրերում: Կաթողիկոսի մի նամակից, գրված 1786 թ., երեվում է, որ քարտեզները պարունակող ծանրոցը ճանապարհին ուշացել էր³⁰ և այդ մասին կաթողիկոսը 1786 թ. ապրիլին տեղյակ է պահել Հերակլ թագավորին³¹ և մելիք Ավետիքին (1786 թ. նոյեմբերի 27-ին)³²: Ծանրոցը հասել է էջմիածին 1787 թ. ապրիլի 17-ին և մի առ ժամանակ անց ուղարկվել ըստ պատկանելույն: Հայտնի է նաև, որ դրանից շուրջ երեք տասնամյակ անց՝ 1816 թ., քարտեղի օրինակներից մեկը, ուսերեն թարգմանությամբ նվիրվել է Ռուսաստանի Ալեքսանդր I թագավորին: ՍՍՀՄ կենտրոնական ռազմապատմական արխիվում պահպանվել է քարտեղի այդ օրինակը³³, որի լուսանկարը հրատարակված է քարտեզին նվիրված ուսումնասիրության հետ միասին³⁴:

Այս հոգվածում հրապարակված նյութերը թույլ են տալիս ասելու, որ Շ. Շահամիրյանի «Աշխարհացոյցը» էջմիածին է բերվել ավելի վաղ, քան մինչև այժմ հայտնի էր և բերողն է եղել Հ. Դինիբեկյանը:

28 Նույն տեղում, թղթ. 2, վավ. 11, էջ 258:

29 А. Р. Иоаннисян, նշվ. աշխ., էջ 152:

30 Մաշտոցի անվ. Մատենադարան, ձեռ. N° 4501, էջ 81 ր:

31 Նույն տեղում, էջ 73ա:

32 Նույն տեղում, ձեռ. № 4481, էջ 191 ր:

33 Центральный Государственный Военно-исторический архив СССР. ф. 416. д. 303.

34 Վ. Գրիգորյան, Շահամիր Շահամիրյանի «Աշխարհացոյց Հայաստանեայց»-ը, «Բանբեր Մատենադարանի», № 6, 1962, էջ 353—362:

Կարծում ենք, որ վերոհիշյալ տեղեկությունները կարող են նպաստել Հովսեփ Դինիբեկյանի՝ այդ նշանավոր դիվանագետի և ճանապարհորդի կյանքն ու գործունեությունը բաղաձայնության և խոր ուսումնասիրության ենթարկելու գործին:

НОВЫЕ СВЕДЕНИЯ ОБ ОВСЕПЕ ДИНИБЕКЯНЕ

Доктор историч. наук В. Р. ГРИГОРЯН

(Резюме)

В черновиках неопубликованных писем и посланий армянского католика Гукаса Карнеци (1780—1799) сохранились аннотации трех писем, касающихся известного армянского путешественника Овсеп Динибекяна. Он служил при дворах грузинских царей Ираклия II и Георгия XII в звании пятисотника и неоднократно ездил в Индию с дипломатическими поручениями. Через него Ираклий II и армянские католики поддерживали письменную связь с видным деятелем армянского освободительного движения XVIII в. Шаамиром Шаамиряном, жившим в Мадрасе. С О. Динибекяном Ираклий II послал в Индию грамоту о пожаловании грузинского дворянства Ш. Шаамиряну.

Первый из публикуемых в статье документов — аннотация ответного письма католика Гукаса от 9 ноября 1781 г. Динибекяну, второй — аннотация написанного в тот же день письма о Динибекяне, адресованного духовному предводителю армян Грузии, архимандриту Карапету; третий — письмо (от 25 мая 1785 г.) Шаамиряну. В этих письмах, входящих в рук. № 2803 и 4481 Матенадарана им. Маштоца, говорится о том, что в 1778—1781 гг. Динибекян совершил поездку в Индию и привез оттуда письма и подарки католику от местных армян. Среди привезенных Динибекяном предметов была историческая карта Армении, опубликованная в 1778 г. в Венеции по заказу Шаамиряна.

В статье приводится также выдержка из документа (хранящегося в архивном отделе Матенадарана), который содержит список подарков, посланных Шаамиряном католику через Динибекяна. На основе армянских источников в статье приводятся сведения и о других путешествиях Динибекяна в Индию.